

2011 doaibmaplána

2011 doaibmaplána mearrida 2011 jahkečoahkkinn miessemánu 2011. Eanaš áššit leat dakkárat maiguin searvi bargá oppa áiggi.

1. SFS miehtá Sámi searvin.

Dađistaga viidána searvi miehtá sámi searvin miellahttolassáneami bokte. Ain bohtet suomabeale fágagirjjálaš čállit miellahtun. Ruota beale fágagirjjálaš čállit leat bázahallan organiserema dáfus, go doppe eai leat SFS:as miellahtut, vaikke leat ge hástalan searvat. Gielalaččat lea doaimmain vuosttamužžan leamaš davvisámegiella guovddáži. Searvi dattege muittuha jahkásaččat ahte searvi lea fáldaldahkan buot sámegeilat fágagirjjálaš čáliide. Nu lea ge fágagirjjálaš čáliid iežaset hálddus ávkkuhit SFS:ain buoremusat.

2. www.samifaga.org

SFS oastá dihtorteknologaš veahki dikšut ruovttusiiddu. Ruovttusiidu lea jurddašuvvon doaibmat dieđihangaskaoapmin miellahtuide.

3. Fágagirjjiide oastinortnet

Viimmat dáhpáhuvvagođii oastinortnet-áššiin juoga 2008:s, mii doaivvuimet rivttes guvlui. Sámedikkis lea soahpamuš dáiddáriiguin mas daddjo ahte čáppagirjjálašvuoda oastinortnet galgá vuoruhuvvot. Sámedikkis ja dáiddárservviin lei oktasaš lávdegoddi mii barggai áššiin. Ii SÁLAS ii ge SFS lean bivdojuvvon oassálastit. SFS:a bealis fuobmáimmet ahte lávdegottis hálle dušše čáppagirjjálašvuodas. Go Sámediggi 2008 rájes vuoruhišgođii fágagirjjálašvuoda, de livččii lunddolaš ahte dákkár girjjit maiddái gullet boahhteáiggi oastinortnegii. Nu han lea namahuvvon Sámedikki bealis juo 2002:s.

Manjá go namahuvvon bargojoavku buvttii evttohuasas, de lea SFS ja SÁLAS ovddasteaddjit fuobmášahtán Sámediggeráđđái ahte dehálaš oassi oastinortnegis orui báhcimin. Mii leat de ožžon lohpadussii ahte dattege galgá fágagirjjálašvuodta mielde oastinortnegii.

Lea dehálaš fuobmášahtit ahte ekonomalaččat dákkár ortnet vuosttamužžan lea ávkin girjelágádusaide. Sii han dan bokte jodihivčče eambo girjjiid. Ovddeš oastinortnegis ii goaikkihan makkárga buhtadus dahje royalty čáliide. Dán galgá maiddái atnit muittus jos lihkestuvvat oazžut ortnega fas johtui.

4. Girjerájus- ja kopibuhtadus

Norgga beali girjerájusbuhtadusa soahpamuš bistá seamma go ovdal, eai ge sámi organisašuvvnat leat ovddidan rievdademiid. SGS ja SFS ”oamastit” 85% olles buhtadusas.

Lea dušše Sámikopiija soahpamuš Norgga Kopinor:ain mii dohkálaččat gáhte ja buhtada sámi vuoignaduoji kopierema Sámis. Ruota Bonus Presskopia ja Suoma Kopioisto eai leat eai ge áiggo čuovvolit Sámikopiija dáhtu, mii lei ahte Sámikopiija galgá hálldašit Ruota ja Suoma sámi buhtadusruđa. SFS sáhtá dál dušše ávžžuhit Suoma ja Ruota beale fágagirjjálaš čáliid ohat stipeanddaid Suoma ja Ruota fágagirjjálaš foanddain.

5. Uhccán fágagirjjit sámegeillii

SFS lea guhká fuobmášahtán ahte otná sámi girjjálašvuodas leat áibbas unnán fágateavsttat sámegeillii, earret oahppogirjjiid. Searvi ávžžuha ain dán oktavuodas omd. Fágagirjjálaš foandda vuoruhit proševttaid mat sáhttet leat mielde lasiheamen sámi fágaprosa olggosaddimiid. Muđui berre searvi ohat eará vugiid ge mo movttiidahttašii almmuhit eambo sámi fágateavsttaid. Dán oktavuodas ohalat dieđusge maiddái lágádusaid áigumušaid.

2008 bušehtamearrádusain viimmat vuoruhišgođii Norggabeale Sámediggi maiddá dokumentára- ja fágagirjjálašvuoda. Sámedikki 2009 bušehtas lei várrejuvnon 3 million dása. Oktiibuot badjelaš 6 mill lei várrejuvnon girjjálašvuhtii. 2010 bušehtii lea submi badjelaš 5 mill, ja 2011 bušehtii vuollil 5 milliuvna. Das sullii 950.000 fága- ja dokumentára girjjiide.

SFS barggai mánga jagi fuobmášahttit sámi eiseválddiide mo almmolašvuoda ruđahisvuolta lea čuohean sámi girjjiid almmuheapmái. Dás lea leamaš erenoamáš bahás váikkuhus sámi fága- ja dokumentára girjjiid almmuheapmái, mat eai oppa leat leamaš vuoruhuvnon ge. Go fas unniduvvui várrejuvnon ruhta girjjálašvuhtii, de oaidnit juo fas ahte dat čuoheá bahádebbo fága- ja dokumentára girjjiid olggosaddimii. Girjjálašvuoda ruhtavátnivuodain šaddá SFS ain rahčat ovddosguvlui.

6. Dulkonoahpahuš ja jorgaleapmi

SFS dahká giellagoziheami sierra prošeaktan. SFS ohcala dulkkaid oahpaheami, ja fuomášuhttit dárbbu profesionaliseret dulkondaimma, ja maiddá nanusmahttit jorgaleami doaimmaid. Geahča maiddá 10. čuoggá.

7. Fágagirjjálaš gudnistipeanda

SFS 2008 jahkečoahkkin mearridii čuoovvovaččat:

B. Gudnistipeanda

Gudnistipeandda sáhtta juohkit foanddastivrra iežas ákkastallama vuodul, ja das árvvoštallojuvvo kandidáhta buvttadeapmi dahje bargu searvvi buorin. Erohus dábálaš juolludemiid ektui lea ahte prošeakta ii dárbbas leat njulgestaga čadnon čállosa dahje sámegielat čállosa buvttadeapmái, muhto juogalágan doibmii mii lea mielde ovddideamen dieđuid ja beroštumiid sápmelaččaid, sámi kultuvrra ja/dahje SFS birra.

Fágagirjjálaš foandda stivra sáhtta dan juohkit olbmui gii ánsása erenoamáš fuomášumi dahje gudnejahttima searvvi bealis.

Stipeandda sturrodat lea NOK 20 000,-.

Fágagirjjálaš foandda stivra lea áibbas friijja ja oktomearrideaddji juolludeamis.

8. Fágagirjjálaš bálkkašupmi

SFS bargá ain ásaht bistevaš fágagirjjálaš bálkkašumi. Dan galggašii dahkat ovttas eará áshusaiguin. Bálkkašupmi galggašii geigejuvnot juohke nuppi jagi. SFS árvvoštallá bidjat dasa NOK 25.000,-, ja hástala SALASa, ja goit guokte stuorimus sámi girjelágádusa bidjat seamma sumi. Bálkkašumi sturrodat livččii dalle NOK 100.000,-.

9. Sámis - Sámi čálakultuvrralaš áigečála

Sámediggi lea viimmat 2010 bušehtii bidjan Sámisii NOK 300.000. ČáliidLágádus vuodđudus lea dohkkehan váldit olggosaddi ovddasvástádusa. Dat mielddisbuktá ahte lágideaddji galgá háhkat áigečállagii dárbbaslaš bistevaš ruhtadeami, ja bidjat dasa doaimmaheaddji jos stuorát bistevaš ruhtadeapmi ollašuvvá. SFS galgá jahkásaččat várret vassis mađe ruđa Fágagirjjálaš foanddas *Sámis* almmuheapmái. Dan ovddas SFS galgá juohke nummirii oažžut saji searvvi dieđuide. Sámedikki fásta juolludemiin oktan evttohuvnon **SFS foandda 40.000:iin** juohke nummirii, galgat almmuhit guokte nummira 2011:s.
